

四庫全書

史部

# 欽定四庫全書

史部

平定準噶爾方略正編卷八十六至

詳校官監察御史<sub>臣</sub>孫家賢

通政使司副使<sub>臣</sub>莫瞻菴覆勘

總校官進士<sub>臣</sub>朱鈐

校對官編修<sub>臣</sub>朱紱

謄錄監生<sub>臣</sub>劉佳瑋

欽定四庫全書

平定準噶爾方略正編卷七十六

乾隆二十四年秋七月辛未

諭參贊大臣舒赫德等安插多倫回人事宜

上諭軍機大臣曰舒赫德等奏稱准兆惠咨來投之多倫回人等暫令於阿克蘇賽里木庫車等處過冬來春或在庫爾勒拜哈喇沙爾居住或遷往伊犁交臣等籌辦但此等回人以遷徙為常性習與

各城有異若與阿克蘇等回人雜處恐滋生事端  
請乘勢即移往哈喇沙爾等空曠之地課以耕種  
交書山就近辦理等語所奏自屬可行然未免稍  
存推諉之見朕命舒赫德在阿克蘇辦事特以擒  
獲逆酋官兵奏凱後留伊撫輯回部數年俟屯田  
駐防諸事就緒再行更替自巴里坤以外一切事  
件孰非其所當經理即有轉行派委者仍宜總統  
察核若謂承辦有人遂與己無涉則斷不可此等

回人既發往哈喇沙爾等處書山應就近辦理仍  
與舒赫德會同商酌俱著傳諭知之

命優卹厄魯特親王達瓦齊

上諭大學士曰親王達瓦齊曾為厄魯特台吉被獲  
獻俘朕念係外藩宥罪錫爵伊自受恩以來隨侍  
禁近一意抒忱奮勉為人尚屬樸誠今聞溘逝深  
為軫惻著賞給治喪銀一千兩伊子羅卜扎仍准  
其襲封郡王

甲戌

命叅贊大臣阿里衮等堵截逃賊

上諭軍機大臣曰昨據阿里衮奏稱領兵追襲霍集  
占等詢問逃來之回人克伯克等告稱霍集占現  
在往追搶掠沙喇斯游牧之布魯特等波羅泥都  
在沙爾呼勒休息馬匹等語阿里衮與逆賊相距  
五六站兆惠前已派明瑞速往堵截宜即行知會  
以便夾攻再明瑞經過之地多屬外夷等曾否

助賊或有陸續歸附者俱著詳查具奏

乙亥

諭定邊將軍兆惠等辦理撫賞各事宜

上諭軍機大臣曰兆惠奏稱前因撫定葉爾羌奏請起程而追賊更關緊要且布魯特人等陸續投見者甚多請暫留英噶薩爾令額敏和卓先往葉爾羌等語辦理甚合機宜此時富德阿里袞巴祿明瑞等應已追及逆賊其接濟口糧招徠降衆仍須

兆惠督率辦理投見之布魯特等有應加鼓勵者  
即傳旨賞賚或須通使即酌派侍衛等前往如願  
入覲亦照從前哈薩克布魯特之例伴送來京庶  
拔達克山安集延等處聞風向化又所奏安集延  
人等願協力擒賊更為可喜一得各路捷音即速  
奏聞又

諭曰富德等奏稱辦理賞給葉爾羌阿卜都里野木  
克理雅喇克等翎頂緞足荷包及擢授阿奇木伊



沙噶等伯克酌定貢賦咨明兆惠查辦等語富德  
所請撫賞諸事俱合機宜可傳諭兆惠將擢授阿  
奇木等伯克照喀什噶爾例辦理其酌定貢賦之  
處伊既令額敏和卓前往葉爾羌即著詳悉查辦  
定議具奏

諭叅贊大臣舒赫德等辦理應留應撤臺站

上諭軍機大臣曰現在葉爾羌喀什噶爾業經平定  
富德等奏報事件由葉爾羌直抵阿克蘇甚為便

捷其葉爾羌至和闐臺站著即行裁撤惟和闐至阿克蘇一路尚應酌留著傳諭舒赫德福祿等遵照辦理

諭定邊將軍兆惠等旌表陣亡官兵

上諭軍機大臣曰據富德等奏稱前至葉爾羌經過兆惠納穆扎爾等領兵勦賊之處陣亡官兵骸骨暴露隨委達爾黨阿鄂博什等瘞埋祭奠等語富德所辦甚是官兵等為國捐軀深可憫惻親製詩

章以示軫念可繕寫清漢蒙古回部字發與兆惠  
令其勒石冢前永昭表忠崇節之至意并傳諭富  
德知之

丙子

諭叅贊大臣舒赫德以議處副總管噶雜納齊等曉  
示回衆

上諭軍機大臣曰據舒赫德奏稱阿克蘇伊沙噶伯  
克頗拉特商伯克呢雅斯揭報副總管噶雜納齊

伯克巴巴克專擅委用又徵收糧石將交官之項  
侵蝕入己且伊等陰結黨援互相唆調恐致滋事  
等語噶雜納齊伯克巴巴克新經歸附朕加恩授  
為副總管自應感激奮勉乃肆意妄行如此本當  
從重治罪姑念伊等向化之初尚未深悉中國法  
度且上年駐劄大兵伊等亦曾効力著革去職銜  
免其治罪同妻子押解進京所遺員缺俟阿奇木  
伯克鄂對回任與舒赫德會商揀選補授并著曉

示回衆知之

八月己卯

叅贊大臣明瑞疏奏追敗賊衆於霍斯庫魯克  
明瑞奏言臣同兆惠於閏六月十四日至喀什  
噶爾十五日往追逆賊霍集占等因思逆賊等  
脫逃已十八日如不在色勒固勒住歇計此時  
將過帕米勒當即緣山行走繞過高峯數處且  
日渡溪河四日未得水草馬匹多損察看前途

情形覺經過之路似屬紆道因詢之嚮導等另覓捷徑有隨後到營之布魯特呼都伯克告稱此即前往帕米勒之路但有向拔達克山及博羅爾二道若往安集延由色勒固勒向北經過哈喇庫勒其地係布魯特之哈卜齊克等部落游牧等語臣即遣人招降布魯特一面晝夜趲行本月二十五日行近哈喇庫勒據哨探人等回報布魯特已遷移游牧但一路有賊行踪跡

又登高瞭望見五六十里有飛塵起處臣等  
即選兵一千三百餘名行至次夜五鼓覓得賊  
踪隨牧放馬匹捉生詢問二十八日黎明據偵  
探兵誇普勒圖等擒獲一名呢雅斯默特詢  
知霍集占兄弟欲往拔達克山衆伯克不從遂  
由此路往安集延五日前聞大兵來信棄其輜  
重令家口先行沿途凡遇無草處俱以大麥飼  
馬計有騎賊七八千人臣等悉力速追於已刻

至霍斯庫魯克嶺追及賊衆約六千餘人於嶺  
上排列我兵先至者九百人整兵誘戰賊不肯  
下山恐相持稍久賊必夜竄當即領兵爭據高  
阜大聲傳諭若擒獻賊首必加恩賞賊衆向下  
施放鎗礮且犯我左翼前隊我兵以鎗矢迎擊  
衝至嶺下向山爭進鏖戰三時賊衆敗遁我兵  
乘勢追射因馬力不及賊漸遠去旋復聚集恃  
其人衆分隊合圍我兵直前衝擊且戰且行賊



衆尾追臣等一面誘戰一面令步兵據山埋伏  
賊近即從山上放鎗臣等回兵衝入賊隊至晚  
賊兵大敗越山遁走臣等見賊衆馬力有餘易  
至竄逸擬擇水草之地暫息馬力夜行晝伏伺  
其無備方可擒獲隨探看賊踪由拔達克山一  
路逃走一面追襲仍遣人通信富德阿里衮併  
報明兆惠查此次我兵力戰竟日勦賊五百餘  
人受傷者無算生擒男婦三十餘人收獲馬駝

牲隻百數我兵陣亡者亦有百餘人容詳查具  
奏臣明瑞雖經勦殺賊衆而未能擒獲渠魁且  
官兵亦有損傷請

旨將臣明瑞從重治罪奏入

上諭軍機大臣曰據叅贊大臣毅勇公明瑞奏稱追  
勦逆回於霍斯庫魯克嶺賊衆六千餘負嵎固守  
時我兵先至者九百人整陣鏖戰經歷三時賊衆  
大敗復恃其馬力前來抗拒我兵直前擊勦賊始

越嶺逃竄此次進勦我兵陣斬逆賊五百餘人俘  
獲男婦三十餘人駝馬牲畜百數受傷者無算等  
語我師以寡敵衆力戰敗賊實屬奮勇効力朕心  
深為嘉悅明瑞著交部從優議敘所有本隊得功  
之大臣侍衛官兵及陣亡人等並著查明造冊送  
部議敘議卹

諭定邊右副將軍富德等會兵奮勉勦賊

上諭軍機大臣曰富德奏與阿里衮明瑞三隊官兵

業經會合揀選四千人往追逆回其存留之兵交楊寧管束招降沙爾呼勒回人以候調遣等語此奏未至之前朕因明瑞官兵較少賊勢尚衆頗厯於懷今既三隊會合兵力倍增如此應機赴節乃上天垂佑必獲渠魁之兆佇聞伊等捷音至嚮導等所云拔達克山交界有隘口數十里僅容一騎又隔大河止一渡口等語萬一賊人逃脫得入拔達克山必不得已即遵前旨撤兵回葉爾羌喀什噶爾

休息次年再行進剿亦可然終以此時獲賊為上  
其各加意奮勉

諭定邊將軍兆惠等辦理安集延追賊事宜

上諭軍機大臣曰兆惠奏詢問嚮導等云拔達克山  
路遠地狹隨逆賊之伯德爾格等俱係安集延布  
哈爾之人必前往安集延若果如此則領兵由鄂  
坡勒穆什一路前往索取等語所見甚是賊若果  
入安集延兆惠既領兵索取而富德等復行追襲

非為我兵所擒即為安集延之人縛獻矣又北路擒獲噶勒雜特得木齊博勒顯據供哈薩克錫喇在安集延布魯特亦未可定併著留心訪查適明瑞捉生詢問有喀什噶爾回人往報逆賊等以大兵信息此等回人尚有藏於喀什噶爾者則葉爾羌亦難保其必無著兆惠留心盤獲即嚴行治罪諭烏魯木齊辦事副都統滿泰辦理哈薩克貿易

上諭軍機大臣曰據滿泰奏稱策布登扎布派嚮導

等領哈薩克貿易之人陸續至烏魯木齊其頭目  
哈斯伯克等稟云此次貿易必須倍得利息若如  
上年則不可而哈薩克之烏穆爾等又云伊等係  
阿布賚所遣不比哈斯伯克但上年所得緞足甚  
為紕薄此次請給以精好者等語從前策布登扎  
布途遇哈薩克人等即云緞足不佳求另定價值  
朕已訓示努三等矣今覽所奏伊等情詞足見其  
貪得無饜若從所請何所底止且換易馬匹特以

備征戰之用今回部計日蕩平亦何必多此糜費  
著傳諭滿泰等若貿易人等仍執前說即諭云大  
皇帝恩賞爾等緞足皆出自內府與商民常用者  
不同況以外藩所無之物許爾等貿易已屬特恩  
爾等馬匹即不行貿易仍可帶回若商人貨物則  
有往返運送之勞倘利息有虧亦難強其再至此  
次交易與否聽爾所願以此明白曉示看其情形  
若何一面辦理即行奏聞努三此時尚未轉回范



時綬現在前往著會同辦理

辛巳

命以叛賊丹巴林沁之兄齊旺多爾濟賞伯克鄂對  
為奴

上諭軍機大臣曰舒常奏稱查得叛賊察哈爾丹巴  
林沁並無妻子惟親兄護軍齊旺多爾濟現在軍  
營等語著傳諭兆惠即將齊旺多爾濟賞給伯克  
鄂對為奴令其嚴加管束稍有滋事即聽鄂對辦

理其丹巴林沁若尚在霍集占處著留心查拏送  
京治罪

諭甘肅總督楊應琚等查送貿易緞疋

上諭軍機大臣曰昨據滿泰奏哈薩克貿易人等有  
所得緞疋紕薄之語在伊等貪得無饜欲以交易  
官緞與前歲賞給阿布賚等緞疋相較固屬妄生  
冀倖自當示以節制但從前議將陝甘緞疋式樣  
轉發江浙織造趨辦或承辦之員因節省工料以

致成色太減亦所不免即如各省辦解內府緞疋尚不能一律精好況於應付邊地之用此亦當留心察核以杜朘削之弊且不使過於紕薄致有累遠人著傳諭楊應琚努三等即查明貿易緞疋約有幾種各取一端送京核驗

壬午

命叅贊大臣舒赫德往葉爾羌辦事

上諭軍機大臣曰富德等現在追捕逆賊霍集占兄

弟自當計日功成萬一不能即獲則來年所需馬  
匹糧餉須就近在葉爾羌辦理今阿克蘇現無要  
務可傳諭舒赫德奉到此旨即赴葉爾羌辦事阿  
克蘇僅納世通一人著德舒前往辦事奏事時列  
名於前其庫車事務著德文辦理併傳諭兆惠等  
知之

諭辦理屯田副都統定長等換易哈薩克馬匹即送

軍營

上諭軍機大臣曰近據定長范時綬等奏報哈薩克貿易人等有馬數千匹來烏魯木齊貿易等語現在富德等三隊合兵窮追逆賊倘未即就擒則接濟馬匹最關緊要著傳諭定長范時綬將所易哈薩克馬匹隨其所得若干即送往軍營

甲申

命護軍統領努三等敘卹追勦嗎哈沁官兵

上諭軍機大臣曰努三等奏稱遣獲扎哈沁之嗎哈

沁塔爾巴等十九人供出偷竊烏魯木齊牧羣之  
訥克衣等因用為嚮導窮追入山賊人棄其馬匹  
婦子以繩自繫越過高峯官兵等衣履穿透未能  
追及仍遣人各路堵截等語數年來侵擾臺站者  
即此等嗎哈沁自知罪重負固深藏努三等尋踪  
堵截殊屬奮勉著傳諭定長清馥令其分道夾攻  
務期弋獲此次追賊中鎗陣亡之吉林馬甲鄂勒  
布善渡河溺斃之千總曹正宗隨守備胡海追奪

羊隻中鎗陣亡之把總李升貴兵丁韓齊貴俱照  
例賞卹得傷兵三名亦照例賞給用為嚮導之都  
楞以招降被害克什蒙克津負傷脫出俱可軫念  
著酌量賞給銀兩又

諭曰遊擊唐朝起護送第三隊軍需羊隻全行交收  
又請隨行追賊奮勇効力殊屬可嘉著記名以叅  
將用遇缺即補

諭定邊左副將軍成衮扎布等辦理新撫烏梁海事

宜

上諭軍機大臣曰成衮扎布奏稱副都統莫尼扎卜等招降察罕喀巴等處之卓特巴博碩昆等五十  
七戶伊等俱鄂爾楚克部落原在阿爾台游牧以  
皮為賦應附入烏梁海大臣管轄等語卓特巴授  
為章京巴彥授為驍騎校所屬二十九戶歸內大  
臣察達克管轄博碩昆授為章京雅爾里克授為  
驍騎校所屬二十八戶歸散秩大臣圖布慎管轄



餘俱如所議行伊等皆新附之人務宜留心管束  
不可滋生事端又

諭曰成衮扎布等奏據莫尼扎卜呈稱察達克等七  
旗之人每遇公事差遣頗知奮勉効力此次搜捕  
嗎哈沁雖未全獲而勦殺十餘戶招降五十餘戶  
應行鼓勵著加恩賞察達克圖布慎等緞各四端  
莫尼扎卜自備口糧効力著賞銀一百兩所報得  
功官兵二十一員名著成衮扎布等查明酌賞陣

亡得傷人等亦照例賞卹

丙戌

諭烏魯木齊辦事副都統滿泰等查奏貿易情形

上諭軍機大臣曰滿泰奏稱哈薩克之哈斯伯克等

四隊貿易人等所到馬匹擇其善者每匹作價四

兩四錢共得一千匹其次者減價六錢共得一百

五十匹交易既竣照例派兵送至羅克倫遣回游

牧等語所辦尚屬妥協但伊等從前以緞足平常

爭論價值今豈竟無一語著將交易時情詞因便  
奏聞又

諭曰滿泰奏隨哈薩克貿易前來之厄魯特喀爾查  
海巴桑藏卜班珠爾三人稱係三年前被擄今情  
願投歸等語伊等俱係三年前被擄並未抗拒大  
兵尚應收留但哈薩克亦皆向化嗣後若從前被  
擄人等私自投回伊等即時追取應仍行查給或  
無人問及即不妨留養亦不必安插開展等處可

押送至京現在喀爾查海等即遵照辦理

諭定邊左副將軍成袞扎布等酌賞勦殺嗎哈沁官

兵

上諭軍機大臣曰成袞扎布等奏稱扎隆阿額爾克沙喇追勦盜竊薩拉卜拉克卡倫馬匹賊人至博爾濟河追及計勦殺二十一人死於寨內者甚多所得馬駝鳥鎗等物分賞効力之人仍向額爾齊斯搜捕嗎哈沁等語此次雖未能生擒賊人以訊

其盜竊踪跡而盡行勦殺已屬奮勉勦捕此等賊人係扎隆阿專責今因特遣額爾克沙喇伊始藉以成功著加恩賞額爾克沙喇緞四端扎隆阿不必加賞其隨行官兵仍著查明獎賞効力贖罪之台吉瑪克蘇爾等應予開復著查明革職原案候朕酌量加恩近已諭扎隆阿額爾克沙喇不必往博克達山即遵前旨轉回游牧

戊子

駐劄烏什辦事按察使職銜納世通等疏奏布  
魯特貿易情形

納世通等奏言七月初八日據庫庫爾里克卡  
倫送到布魯特貿易之克勒第告稱係薩雅克  
部落居住一千戶之總管去年將軍等招服布  
魯特時曾給印文令往招安集延部落來伊犁  
投見本年正月往伊犁尋覓將軍未遇近聞霍  
什克伯克等曾見將軍大臣隨帶馬牛羊隻於

閏六月初一日起程聞將軍進兵烏什有駐劄  
大臣懇准貿易等語臣等查克勒第所帶牲畜  
無多毋庸官買且時價甚昂因曉示云我內地  
所送牲畜甚多不須貿易但既有將軍印文我  
等照看令向烏什回人交易隨派員照管馬牛  
自三十兩至四十兩羊隻概以十三兩定價貿  
易六日全行售盡克勒第等甚為感悅臣等賞  
給緞布等物於十八日送赴卡倫令回游牧奏

入報

聞

壬辰

定邊右副將軍富德等疏奏追敗逆賊霍集占  
於阿爾楚爾

富德等奏言臣等於喀喇烏蘇合兵追賊捉生  
詢問霍集占兄弟逃走所向七月初七日探知  
賊踪相隔一百餘里有大戈壁初八日領兵牽



馬星夜急行初九日辰時至阿爾楚爾追及賊  
尾賊覺以馱載先行預伏賊衆於兩山間列陣  
谷口以誘我兵臣等分兵三隊左翼巴圖濟爾  
噶爾鄂齊爾等以鎗礮攻奪左山右翼由屯伊  
柱攻奪右山中軍亦發大神礮自辰至午賊皆  
敗走我兵在山上者奮勇下擊臣富德令噶畢  
雅圖巴圖魯額爾登額協助左翼塔蘇爾海巴  
圖魯占頗圖協助右翼仍由中軍呼噪衝突臣

阿里衮明瑞巴祿阿桂率領隊大臣侍衛等兩翼衝擊賊遂大潰臣等追射三十餘里賊衆據一高山臣富德等整兵對戰臣明瑞阿桂攻奪山峯瑚爾起巴圖魯侍衛額爾登額老格侍衛額爾登額塔爾海烏三泰科普薩白山麓橫衝賊以死拒守臣富德等佯為奪賊馱載徑往追襲賊懼皆越山敗走臣阿里衮巴祿追保護馱載之賊賊衆又據一山因與達爾黨阿溫布由

屯伊柱豐安等接戰臣富德阿桂傳景領侍衛  
官兵策應臣明瑞鄂博什繞出賊後賊又復潰  
逃臣等領兵急追賊且戰且走至夜收兵擇有  
水草處暫息馬力計追賊四千餘人勦殺者千  
餘人生擒五十餘人奪纛六桿礮五位鳥鎗長  
鎗以千計疲乏中傷牛馬亦多并訊知惡黨阿  
卜都克勒木等數大伯克俱被我兵陣斬我兵  
陣亡者一名得傷者不過十名餘奮勇出衆官

兵照例令戴獎賞翎仍俟查明造冊奏請議敘  
議卹臣等因賊踪與拔達克山邊界相近次日  
又速行追襲奏入

上諭軍機大臣曰富德等奏稱追及逆酋霍集占於  
阿爾楚爾我兵奪山衝擊陣斬賊衆千餘人生擒  
五十餘人獲礮燧器械牲隻無算賊衆大敗窮竄  
現在乘勝悉力追擒等語大臣官兵等爭先奮勇  
力勦逆回覽奏深為嘉慰仰賴

上蒼福佑逆酋計日就擒可立待伊等捷音也其自將  
軍至領隊大臣俱交部從優議敘侍衛官兵及陣  
亡得傷人等俱著查明造冊送部議敘議卹又

諭曰富德等奮勉勦賊已交部從優議敘以道遠不  
能多齎賜物惟將軍叅贊領隊大臣等各賞荷包  
鼻煙壺即行發往至奏內逆黨阿卜都克勒木等  
大伯克數人俱已勦殺等語其餘大伯克之名及  
如何勦殺係何人立功之處仍著附便奏聞

癸巳

命議敘拏獲厄魯特僕役盜馬潛逃之官兵等

上諭軍機大臣曰清馥等奏稱詳訊被嗎哈沁擒去  
放回之厄魯特僕役畢里克圖等究出伊等勾通  
盜馬欲投俄羅斯情由將首謀之巴特瑪等七人  
俱行拏獲正法等語此等在巴里坤留看行裝之  
官兵僕役等竟敢造意潛逃清馥即派兵全行拏  
獲辦理甚妥著交部議敘其効力官兵等俱應加

陞賞疎防人等分別議處責懲俱著照所請行

丙申

諭定邊左副將軍成袞扎布遷移烏梁海等游牧事宜

上諭軍機大臣曰成袞扎布奏據莫尼扎卜告稱察達克等因現在科卜多等處貂鼠無多請移往阿爾台在額爾齊斯之源游牧等語察達克所屬烏梁海年來効力行走且額爾齊斯現亦空曠即從

伊所請亦可但該處原係都爾伯特游牧今策凌  
烏巴什等在烏蘭古木居住前曾降旨伊等若願  
歸舊地亦聽其便可傳諭成衮扎布曉示策凌烏  
巴什等云察達克等請往額爾齊斯等處游牧奏  
奉諭旨以額爾齊斯原係爾等舊地今察達克所  
指之處若與游牧無礙即從其所請或爾等願歸  
舊地現在哈薩克俱降伊犁賊衆盡滅全無足懼  
即可遷移爾等現在游牧之地亦可賞給察達克



等但哈薩克新附不比爾等歸誠日久須嚴飭所  
部安靜無事若騷擾哈薩克邊界則伊等具奏時  
朕難於訓諭至爾等既遵約束而哈薩克反來擾  
害則拏獲即行正法亦為理直言順爾等或安土  
重遷即無庸置議此額爾齊斯之地與其為哈薩  
克俄羅斯竊據不若使烏梁海人等遷移亦將此  
旨宣示察達克等令其各安生業毋得滋事所有  
辦理情形仍著妥議具奏

平定準噶爾方略正編卷七十六

欽定四庫全書

平定準噶爾方略正編卷七十七

乾隆二十四年八月辛丑

定邊右副將軍富德等疏奏大敗逆賊霍集占  
等於伊西洱庫爾淖爾

富德等奏言臣等敗賊於阿勒楚爾乘勢追逐  
日行百餘里至七月初十日薄暮追至布隆庫  
勒稍息馬匹據巴圖濟爾噶爾報稱見一大淖

爾沿岸有賊踪跡臣等遂詢之布魯特嚮導據稱此名伊西洱庫爾淖爾係拔達克山界山高石險雖山足有路僅容單騎過一大嶺與拔達克山之村莊相近其北大山內亦有一路可通拔達克山安集延等語臣等公議既經追及逆賊應乘其未入別部落先行堵截俾首尾受敵賊必自亂臣阿里衮達爾黨阿由屯官長保瑚什等領兵五百在淖爾以西通拔達克山要隘

堵截伊柱鄂博什溫布巴圖濟爾噶爾鄂齊爾  
等領兵八百在山後堵截臣富德巴祿明瑞阿  
桂領隊大臣傅景瑚爾起等領馬步兵千有餘  
名尾隨賊踪至伊西洱庫爾淖爾望見賊人先  
據山麓於淖爾路口施放鎗礮其輜重家口有  
由山後攀援而上者有擁擠於淖爾沿岸者我  
兵欲向上衝擊緣賊據山峯石多而險臣等整  
隊齊進連發大神威遠等礮自己至未賊以死

拒臣等於健銳營吉林索倫厄魯特等各營內  
挑選烏鎗精利者四十餘人派前鋒叅領喀木  
齊布厄魯特侍衛齊里克齊獎賞藍翎錫勒畢  
善領步兵自山北而上令巴圖魯侍衛額爾登  
額老格領兵策應攻擊一面令霍集斯鄂對阿  
什默特等豎立回纥高呼諭降至酉刻回衆數  
千人率其家口馱載同聲額降從山奔下逆賊  
霍集占猶在山頭攔阻殺死多人而降者益多

直至日暮我兵防賊逃竄臣明瑞哈達哈瑞濟  
布愛隆阿領兵二百餘名堵截北山令伊柱等  
策應臣富德巴祿阿桂傅景瑚爾起額爾登額  
老格各領兵一百名在東山一帶分地設伏令  
侍衛烏三泰蒙固勒特通額傅靈安等往來巡  
查臣阿里袞復領兵由淖爾之南堵截因未抵  
嶺前時賊已據淖爾北山監立回纥南面無徑  
可通不可令賊人竊據一面攻奪山峰一面勦

殺沿岸賊人取其家口輜重十二日黎明嶺上賊人俱逃其北面被我兵放鎗截住回人二千餘懇乞投誠臣阿里袞將為首伯克喚至訊問僉稱霍集占兄弟既敗無分晝夜逃至此地恐被大兵追及波羅泥都先期領兵二百來據此嶺霍集占據守伊西洱庫爾淖爾迤東山險以拒大兵旋因回衆投降不能攔阻奪取馬匹逃至淖爾之岸夜繞山峰過嶺尋兄我等早欲投



誠因被迫無奈今懇祈活命臣等共計收獲賊衆一萬二千餘人軍器二千餘件駝騾牛羊萬餘臣阿里袞選兵二百餘名於十二日過嶺尋踪追勦臣富德詢據俘獲人口所供逆賊餘黨不過四五百人酌留公鄂對散秩大臣阿什默特員外郎留保住閒散効力托穆齊圖併侍衛兵丁等管束降回臣富德巴祿阿桂傳景瑚爾起即領馬步兵四百餘名亦於十二日起程策

應阿里衮臣等至拔達克山境內查勘踪跡先行曉諭該部落人等令其將逆賊兄弟速行縛獻奏入得

旨下部知之

臣等謹案霍集占兄弟棄窟攜孥跳而遠遁誠為驚我先聲望風自潰而狡謀所蓄未嘗不姑以二城為餌冀我兵或懈窮追則釜底游魂尚圖復返我

皇上握機決勝謂二酋一日不獲則軍務一日不竣  
於是師武臣稟承

睿算間道躡蹤雖駭走已及兩旬而颶馳不淹俄頃  
叅贊大臣明瑞一蹙之於霍斯庫魯克以九  
百人潰賊數千騎副將軍富德再襲之於阿  
勒楚爾復勦賊千餘殲其黨阿卜都克勒木  
等當是時二酋益褫魄墮膽鋌走弗擇矣迨  
至伊西洱庫爾賊勢危在呼吸遂據險

以延殘喘將軍等決計禽獮以阻欽限淖單  
騎僅通之地而衝突無前電掣霆轟迅如摧  
朽已而樹燾受降鋪崖靡至逆酋持刃遏之  
衆輒倒戈相向僅以四百餘人竄入拔達克  
山殆如窮猿之縶焚林枯魚之依涸澤不待  
都九獻馘而早有以制其命矣昔周之逐獫  
狁也其詩以為一月三捷而箋疏家卒不能  
舉其人其地以實之豈若

今日校威遠播震蕩絕域應機赴節三戰定勲而  
天筆勒銘大書深刻炳耀於雪山蔥嶺以西又豈采  
薇篇什揚厲虛詞者所能髣髴萬一哉

定邊將軍兆惠等疏奏辦理葉爾羌等城事宜  
兆惠等奏言臣等前以辦理喀什噶爾等城事  
宜條議具奏今臣等行抵葉爾羌查所屬二十  
七城村計三萬戶十萬餘口謹繪圖呈

覽其葉爾羌貢賦從前噶爾丹策零時每年交納

十萬騰格內計白米二百六十一帕特瑪有奇  
米五千八百三十九帕特瑪棉花一千七百十  
五察喇克紅花四百二十八察喇克共折錢二  
萬七千二百八十騰格有奇各項匠役納錢五  
萬四千七百八十騰格有奇城卹酒肆園林碾  
磨金銀稅共一萬七千九百騰格有奇此外有  
金稅貿易緞布牲隻等稅喇嘛糧罽果園葡萄  
雖按則徵收而全完者少霍集占入城雖止徵

二萬四千騰格雜糧二千一百九十帕特瑪及  
折徵牛羊稅九百騰格而額外科斂衣服牲畜  
不時擾累供應稍遲即行抄沒以致回人日困  
臣等查辦之際有大小回人等跪呈亥年間霍  
集占圍城三月餘及此次逃竄又行搶掠生計  
甚屬艱難等語臣等察看葉爾羌城村情形與  
喀什噶爾不同現在本年七月起交雜糧一千  
四百帕特瑪各項謀生人等交一萬二千騰格

嗣後勉力耕作次年加增一倍外交黃金四十兩葡萄一千觔至辛巳年再行定議餘照喀什噶爾之例其隨賊逃竄人等地畝計籽種五百二十七帕特瑪除踐踏之處計已種者一百九十帕特瑪請與房屋園林一併交收入官至葉爾羌之大伯克等多為霍集占所殺或挾之同竄現在人等惟授為密喇卜之托克托和卓人尚奮勉餘俱平常霍什克伯克舊為葉爾羌等



城阿奇木伊叔素賚瑞亦久為商伯克臣兆惠  
臣額敏和卓公議將霍什克伯克署理葉爾羌  
之阿奇木事務素賚瑞辦理商伯克事務可否  
委用請

旨遵行奏入得

旨如所請行

命定邊將軍兆惠來京

上諭軍機大臣曰富德等追賊至拔達克山界收其

游牧逆賊霍集占以數百人遁走已遣使往拔達克山索取若拔達克山縛獻賊首則已或有遲疑則來年進兵仍令富德明瑞等前往此時兆惠在葉爾羌辦理已竣即著來京其回部大伯克等俟擒獲霍集占時再率同入覲俱著傳諭知之

諭駐劄闕展副都統定長等解送軍營馬匹

上諭軍機大臣曰富德等追賊抵拔達克山遣使諭令縛獻萬一未能即獲則來年進兵馬匹最為緊

要昨諭將烏魯木齊所易哈薩克馬千餘匹送往  
軍營著再行傳諭將此項馬匹即由庫車送赴富

### 德軍營

諭駐劄庫車布政使德舒等辦理庫車事宜

上諭軍機大臣曰德舒奏稱庫車沙雅爾兩處回衆  
從前被厄魯特搶掠霍集占擾害所餘戶口無多  
除糧石外絕無什物但地土頗肥回人等不善耕  
種若以兵丁叅雜可望豐收將來接濟伊犁較內

地實為省便等語甚屬留心辦理昨諭德舒往阿克蘇辦事德文接辦庫車事務德舒與德文交代時務將辦理情形詳悉告知庶有裨益所奏署筆帖式前鋒德福馬甲永保効力有年俱著加恩賞給駙騎校職銜俟凱旋後遇缺即補

定邊右副將軍富德等疏奏勦撫沙喇斯瑪呼斯餘賊

富德等奏言臣明瑞與哈達哈端濟布愛隆阿

領兵二百名截賊人向北逃路派副都統伊柱  
鄂博什溫布鄂齊爾巴圖濟爾噶爾齊凌扎卜  
豐安等策應七月十二日薄暮伊柱等來告云  
有賊衝突我等截住賊上山結寨等語詢之降  
回等云此即厄魯特沙喇斯瑪呼斯因令厄魯  
特等高呼俾其擒霍集占以贖罪賊衆不應臣  
富德前行追襲臣明瑞等駐守竟夜見賊結寨  
峰頭排列鳥鎗端濟布即越嶺阻截臣等領兵

步行上山鎗矢競發勦賊二百餘人尚存賊四百餘勢不能支有宰桑雅瑞得木齊丹巴來投遂俱納降端濟布亦勦賊十餘人收降十餘人獲駝礮八位及上年所失威遠礮二位查沙喇斯瑪呼斯怙惡難追請暫為撫納俟追賊事竣再行查明正法奏入報

聞

壬寅

諭定邊右副將軍富德等辦理逸賊及降人事宜

上諭軍機大臣曰昨富德等以霍集占等逃入拔達克山業經遣使索取具奏但賊踪已近不行速追殊與機宜未合伊等招降賊衆萬餘即馬匹其乏揀選數百斷無不得之理而賊衆止三四百人經過甫二日窮追自必成擒或以拔達克山為外藩不便驚擾但果秋毫無犯伊等亦何辭以拒從前阿睦爾撒納投入哈薩克策楞等初尚不敢遣使

而後來長驅直入阿布賚即畏懼乞降皆富德所  
深悉者乃勞瘁多時而稍一遲疑渠魁即失殊為  
可惜至所奏收獲回人厄魯特萬餘口亦須辦理  
妥協此等賊黨與葉爾羌喀什噶爾回人俱有讐  
怨將安插於何地即令在他處安插不過徒糜養  
贍況渠魁未獲兆惠又即來京富德若不加意防  
範萬一與霍集占等相通更滋事端今思烏沙克  
等人衆隨逆賊世居伊犁必相依戀斷不可信且



沙喇斯瑪呼斯人等又係暫留日後辦理時伊等  
必生疑懼此外實係從阿克蘇沙雅爾庫車等處  
迫脅同行者自可遣回本處安插可傳諭富德詳  
加查詢委霍集斯等先將伊等家口安插舊地計  
烏沙克等男丁應亦無多看其情形稍有變動即  
相機辦理非不欲加以仁愛乃事機所迫不得已  
也若二賊業已就擒即不必如此辦理

癸卯

申諭定邊右副將軍富德等賊衆逃匿情形

上諭軍機大臣曰富德奏據拔達克山部落人等告稱霍集占搶掠伊等牲畜欲逃他處其言更不可信賊人逃入伊等境內必且哀乞容留何敢加以騷擾看來伊等早與賊通不過令其潛匿耳至賊人去已二日前路有大戈壁等語特欲懈我疾追之心否則賊人挈其家口行李應較追兵遲滯何以迅速若此又求我兵稍為遠駐俱屬欺飾之詞

即如從前阿睦爾撒納入俄羅斯森博羅特圖喇  
既已送交伊頭目尚以溺斃為詞與此等情節相  
似再所得降人萬餘若盡收其馬匹不但益我軍  
資亦可消其妄動之念或拔達克山稍有推諉又  
可整兵進取總之先難後獲事理之常此時殊為  
厘念現在辦理情形若何作速奏聞

諭甘肅總督楊應琚籌辦馬匹事宜

上諭軍機大臣曰副將軍富德等追勦逆賊霍集占

兄弟收其大隊賊衆僅餘數百逃入拔達克山現在傳示令其縛獻萬一稍稽時日尚需進兵索取計軍營糧餉已有回人儲積可以取資惟馬匹最關緊要自應先期辦理接濟近經軍機處議覆吳達善將莊浪滿營馬三千二百餘匹送往巴里坤備用此外各標營或尚有馬匹堪以挑選者俱可酌量調撥但甘省因旱間成偏災恐芻豆購辦不易則飼秣不能妥協雖前督臣黃廷桂著有章程

而天時非去歲可比朕深為廑念著傳諭楊應琚約計該省可得馬匹若干將本地芻豆足數若干匹出關之用先行定數具奏以便降旨照阿里衮解送馬匹之例派員前往至此次所辦馬匹特因索取逋逃非又事軍興徵發楊應琚務通行曉示官民不得稍涉張皇總以有濟軍行而不累民生為要至各營摘缺馬匹此時且不必亟籌補額既暫省內地芻糧而將來凱旋在即亦無難徐議歸

補該督其悉心籌畫辦理具奏

甲辰

命御前侍衛署副都統安泰查審副都統滿泰等叅案

上諭軍機大臣曰定長等叅奏滿泰貪婪敗檢范時綬役兵漁利各款伊等俱特派前往辦事之人竟敢肆意妄行若此深為可駭自應查審明確重治其罪著派安泰馳驛前往會同定長等審訊滿泰

范時綬如係實情即將伊二人在彼正法或事屬  
子虛及獲罪有因安泰亦即據實查奏

乙巳

諭內閣學士清馥回巴里坤辦解馬匹

上諭軍機大臣曰據努三奏稱八月初四日厄魯特  
嚮蕞蒙克津等在雪山松林內尋獲嗎哈沁訥克  
衣踪跡盡俘其家口惟訥克衣隻身逃出等語現  
在偷竊牧羣之賊已有努三追襲清馥可不必前

往即回巴里坤昨已諭楊應琚辦解馬匹除派出  
侍衛外仍令清馥監看此時即於巴里坤官兵內  
選熟悉道路留心牧養之人在哈密豫備照上年  
阿里衮送馬之路行走但從前係急需應援此次  
特為來年進兵之用祇宜加意牧養緩行不可致  
令疲乏

諭甘肅總督楊應琚揀送軍營馬匹

上諭軍機大臣曰昨諭楊應琚辦解車營馬匹今扎



拉豐阿阿蘭泰解送甘肅之馬有一萬一千餘匹  
因思此項馬匹合之各標營所有為數愈多內地  
芻豆更為糜費莫若及時挑選送至葉爾羌等處  
以濟軍行則祇須沿途飼秣似此通融調劑災民  
既不致拮据而軍營亦資實用但解甘馬匹恐長  
途疲乏應先將在甘牧養之馬辦送為宜其自哈  
密至軍營已派清馥及乾清門侍衛等照管著再  
行傳諭知之

丙午

恩准送馬滿兵納清泰等歸旗

上諭大學士曰據楊應琚奏准將軍兆惠咨稱前次  
派解馬匹之納清泰等三十四人行走俱屬黽勉  
等語伊等前從準噶爾脫出暫補綠旗名糧今既  
効力行走著加恩各歸本旗令其照舊當差以示

鼓勵

丁未

命議敘追勦賊衆之大臣官兵等

上諭軍機大臣曰富德奏追勦逆賊霍集占奮勉効力之大臣官員等功次俱著加恩交部議敘此內達爾黨阿哈達哈等又効力出衆達爾黨阿哈達哈著俱授為二等侍衛巴圖濟爾噶爾鄂齊爾喀爾喀台吉額林沁阿拉善台吉達瓦各賞銀一百兩若未經賞翎即著賞給扎拉豐阿賜號錫朗阿巴圖魯塔瑪鼎賜號哈朗圭巴圖魯其巴圖魯侍

衛德爾森保額爾登額俱授為頭等侍衛額爾登  
額賜號鄂爾楚克巴圖魯伊達木扎卜賜號西爾  
古齊巴圖魯碩通授為二等侍衛巴圖魯侍衛老  
格賞銀五十兩仍將伊等交部議敘其新賞巴圖  
魯號者照例賞銀一百兩又

諭曰據富德奏稱伯克霍集斯之兄弟諸子多為霍  
集占戕害深可憫惻伊此次亦屬奮勉自効著加  
恩晉封貝勒仍賞緞十端富德等即傳諭撫慰

命革乾清門頭等侍衛官長保職留軍營効力贖罪  
上諭軍機大臣曰覽富德奏此次進兵官長保未曾  
奮勉効力深負朕恩著革職留軍營効力贖罪  
諭定邊將軍兆惠等酌辦來京及駐劄事宜

上諭軍機大臣曰富德等奏稱伊西洱庫爾所收回  
衆萬餘軍前不及察核派兵五百名委齊凌扎卜  
等逆回英噶薩爾交將軍兆惠查辦等語此等回  
人內如烏沙克伯德爾格等衆俱久住伊犁為霍

集占所親信兆惠等當留心防範稍有可疑即相機辦理其阿克蘇沙雅爾庫車等回衆仍行安插舊地前已屢降諭旨兆惠等遵照辦理後即遵旨來京兩將軍之印仍留該處著舒赫德等以叅贊大臣護理駐葉爾羌辦事其奏摺列名以舒赫德為首前屢諭來年進兵應先將軍營現有馬匹加意牧養今又諭楊應琚酌量內地可得馬匹若干解送軍營兆惠富德舒赫德等勿因內地又辦馬

匹遂不加籌畫所有軍營牧養馬匹及向布魯特  
回人等換易購買事宜仍盡心辦理將軍等起程  
即交舒赫德接辦富德等奉到此旨可將現在情  
形及如何辦理之處作速奏聞又

諭曰圖倫楚達禮善久在軍營留保任係部院司員  
亦不甚有承辦之事敦察年齒已老傳靈安在軍  
營亦近三年著俱隨兆惠等來京

九月戊申朔

諭定邊將軍兆惠等查辦逆黨及裁汰冗兵

上諭軍機大臣曰據富德奏查出波羅泥都已出妻室供稱英噶薩爾等處尚有波羅泥都出妻二人隨行文兆惠查辦等語從前明瑞奏稱捉生詢問喀什噶爾有人為逆賊通信是否即此兩婦抑係伊等親族著兆惠詳加查訊若情罪確實即重懲示衆倘非若輩亦不必有意附會又

諭曰擒獲逆賊一事歲內若未能就緒軍營所有滿



洲索倫蒙古兵內如有老邁患病及負傷無用之人即查明裁汰發回綠旗兵亦甚多當酌量留用其餘遣赴庫車屯田兆惠富德即商辦奏聞

申諭內閣學士清馥辦解馬匹事宜

上諭軍機大臣曰昨命楊應琚將所辦馬匹解至哈密交清馥轉解軍營此次管解馬匹與春季達爾黨阿等情形不同伊等既經由上年阿里衮送馬之路一切俱查照辦理阿里衮係由巴里坤前往

帶有索倫兵丁清馥亦揀選該處現有兵丁及跟役等帶往倘不敷用即於玉素富所屬回人內酌量揀選賞給口糧遵前旨緩行解送仍將現辦情形奏聞

諭甘肅總督楊應琚辦解軍營駝隻

上諭軍機大臣曰前令山西辦駝四千五百餘隻解赴肅州轉解軍營未知已全解否倘尚有留肅餵養者即乘解馬之便酌量搭解不必留存備用將

來大兵凱旋時一切俱可易辦不若此時之有裨實用也倘現無可解亦不必勉強從事

己酉

諭定邊將軍兆惠等務期擒獲逆回及查拏厄魯特逆黨

上諭軍機大臣曰兆惠等以得旨議敘奏謝并及霍集占等窮蹙遁逃拔達克山部落素稱馴謹自必不敢容留但慮逆賊改裝乞食逃赴痕都斯坦等

處或途次為人殺害事跡難明等語所奏殊有息事之心兆惠不宜出此昨富德追賊未曾深入朕曾降旨訓示益逆賊等負恩抗拒情罪難逭若聽其竄伏苟活則回衆仍懷觀望必滋事端現在糧餉馬匹俱已籌辦拔達克山若仍未縛獻逆賊來年必領兵進剿再富德等招降沙喇斯瑪呼斯人衆有無誘害滿福之敦多克哈什哈等在內若一經查獲即嚴行押解送京

定邊將軍兆惠等疏奏移駐臺站事宜

兆惠等奏言本年六月臣等從阿克蘇進兵烏  
什一路安設臺站將來冬寒雪盛於牲隻無益  
今既在葉爾羌辦事應仍將臺站移於巴爾楚  
克至葉爾羌共十臺每臺察哈爾兵八名綠旗  
兵四名回兵三名派侍衛福保等前往安設自  
巴爾楚克至阿克蘇應設臺站若干行文舒赫  
德等辦理至巴爾楚克一路葦草甚多如每臺

添騾數頭可省馬力其臺站人等糧餉麥豆或  
造船由葉爾羌河運送或以車輛裝載再為酌  
辦所有烏什一路臺站即行撤回至喀什噶爾  
葉爾羌中間臺站仍留以遞送事件奏入報

聞

辛亥

命陞賞進勦得功之大臣官員等爵秩有差

上諭軍機大臣曰富德等奏貝勒品級伯克霍集斯

公品級鄂對散秩大臣阿什默特頭等侍衛噶岱  
默特於阿勒楚爾伊西洱庫爾等處奮勇勦賊布  
魯特比阿奇木嚮導大軍亦屬効力員外郎赫倫  
留保住筆帖式金保屢經戰陣且盡心辦事又藍  
翎侍衛賽神保伊什收降布魯特厄魯特佐領阿  
薩克擒獲埋伏回人俱獎賞孔雀翎署筆帖式五  
十五久從兆惠立功此次亦屬奮勉因係另記檔  
案之人聲明請旨等語大臣官員等勦賊奮勉殊

屬可嘉除伯克霍集斯已封貝勒外著加恩封鄂  
對為貝子阿什默特噶岱默特俱封為公此阿奇  
木授為散秩大臣赫倫金保以應陞之缺即用留  
保住著交部議敘賽神保伊什俱授為三等侍衛  
阿薩克賜號塔蘇爾海巴圖魯賞銀一百兩五十  
五著加恩作為另戶准其實授筆帖式

命革職効力之圖倫楚等復爵授職有差

上諭軍機大臣曰富德奏革職効力之圖倫楚等追



勦賊衆頗著勞績等語圖倫楚等自知罪愆効力行走著加恩授圖倫楚為頭等侍衛達禮善為二等侍衛敏珠爾多爾濟給還公爵杞穆齊圖授為主事留軍營辦事俟戶部主事缺出令其坐補恩賞勦賊官兵等銀兩緞疋

上諭軍機大臣曰富德等奏阿勒楚爾等處擊敗賊衆奪取轟礮之叅領喀爾庫等官四員兵十四名著加恩分別賞給銀兩緞疋仍於應陞處記名陞

用以示鼓勵

定邊右副將軍富德等疏奏招撫沙爾呼勒等  
回衆

富德等奏言臣等會兵喀喇烏蘇時將沿途馬  
匹及選剩綠旗兵丁交總兵楊寧管轄令其招  
撫沙爾呼勒等回人今據送到回人阿布勒海  
森布魯特阿勒達什告稱我等沙爾呼勒原有  
五百戶交納葉爾羌金五十兩今僅存一百十

餘戶四百餘人頭目穆喇特伯克已查明戶口  
田土數目特來求見等語又布魯特阿勒達什  
等告稱我等哈喇薩達克哈咱拉雅克布魯特  
共七十戶雖舊屬葉爾羌而無貢賦惟承辦博  
洛爾拔達克山痕都斯坦各路往來差使聞沙  
爾呼勒歸降特來求見願為

大皇帝臣僕等語臣等加以撫慰令候葉爾羌等城  
賦役定議之日一併辦理阿布勒海森等俱歡

欣叩首辭去奏入報

聞

壬子

申諭定邊將軍兆惠等拔達克山支飾情形

上諭軍機大臣曰富德等奏稱拔達克山衮都村伯  
克沙莽蘇爾等遣人告稱霍集占兄弟所領約三  
四百人搶掠經過伊等會集四五十人尾追霍集  
占等且戰且走高呼云我係回部之汗前往默克

禮佛並不曾擾累爾等為何追掠等語此言果實  
則富德等前此愈宜窮追即如賊衆三四百人家  
口在其內拔達克山人等即已追及我兵豈獨不  
能至謂不曾擾累則伊等前所云賊人入境搶掠  
牲隻因登山避匿與此次所告不符亦當詳加詰  
問且逆賊等高呼前往默克亦係夫吾之語默克  
地方在布哈爾果欲前往亦何必預為宣播細核  
情詞顯係伊部落容留賊衆飾詞欺誑意圖漸息

事端富德等當必不為所惑總以來年進兵為要  
俟將軍等回程時再降諭旨此諭即作速覆奏

命賞敘軍營揀選之効力侍衛官兵等

上諭軍機大臣曰富德等將軍營効力人員分別揀  
選共九十人此內成果等十一人尤為奮勉應加  
恩賜巴圖魯號二等侍衛成果著賜號布林巴圖  
魯三等侍衛英德訥賜號特穆爾巴圖魯達什達  
瓦厄魯特三等侍衛齊里克齊賜號布哈巴圖魯

藍翎侍衛愛普薩賜號波羅特巴圖魯厄魯特藍  
翎侍衛克什克圖賜號多克慎巴圖魯藍翎署前  
鋒長沙爾呼善賜號多什欣巴圖魯委署筆帖式  
前鋒海祿賜號噶卜什海巴圖魯齊齊哈爾委署  
叅領鄂勒多喀賜號哈爾察海巴圖魯呼倫貝爾  
領催玉勒古內賜號伊克巴圖魯打牲記名領催  
部委防禦都倫賜號阿穆爾巴圖魯俱照例賞銀  
一百兩仍賞戴孔雀翎達什達瓦厄魯特副管旗

章京密舍里甲喇巴圖賞戴孔雀翎領催額齊克  
森賞戴藍翎俱著記名以該旗應陞之缺補用杜  
爾巴集賽厄魯特托博彥和托木巴克等俱授為  
護軍賞給錢糧仍賞戴藍翎其餘七十四人內侍  
衛藍翎侍衛俱加一級官兵人等俱以應陞之缺  
補用仍交部議敘又

諭曰軍營効力之侍衛官兵等已降旨分別加恩尚  
有救援圖倫楚之兵丁喀爾喀救援英德訥之克



車德衣諾科敦察等四人可酌量賞賜以示鼓勵  
命議敘護軍統領努三等

上諭軍機大臣曰努三等奏搜捕瑪哈沁訥克衣等  
盡行拏獲即將賊首和通哈喇阿岳正法訥克衣  
和通策凌喇嘛椿丕勒扎木蘇送至烏魯木齊嚴  
加看守俟餘黨盡勦將訥克衣正法餘犯解京等  
語努三此次辦理甚合機宜著加恩交部議敘隨  
行官兵人等俱著查明送部議敘努三從前專辦

哈薩克貿易事務其烏魯木齊屯田即著魚管前  
諭擒獲訥克衣解京今照所請即在彼正法其喇  
嘛椿玉勒扎木蘇仍行解送

平定準噶爾方略正編卷七十七

欽定四庫全書

平定準噶爾方略正編卷七十八

乾隆二十四年九月癸丑

諭定博克達山祀典

上諭軍機大臣曰努三奏稱博克達山在烏魯木齊之東為西陲重鎮前年將軍兆惠於察罕郭勒會經致祭嗣後未見舉行請頒祭文香帛令駐劄大臣每年春季於烏魯木齊之巴爾哈達致祭等語

所奏甚是著照所請行除祭文香帛由內頒發交該處駐劄大臣敬謹致祭外其所用犧牲品物即於該處虔辦著為例

申諭內閣學士清馥回巴里坤解送馬匹

上諭軍機大臣曰清馥奏搜捕嗎哈沁行至格根與努三相遇知訥克衣等已獲伊即向哈卜塔克拜塔克前往等語昨已諭清馥回巴里坤管解軍營馬匹若歸途之便遇有嗎哈沁即行就便辦理不

必遠行搜捕

定邊右副將軍富德等疏奏獎賞効力回人

富德等奏言臣等前從和闐進兵奉有獎賞効力回人銀兩緞疋之

旨查所帶六城伯克及回人六百名原以備攻城掘濠之用因逆賊等聞風先遁已經遣回無庸賞給此次隨臣等追賊之貝勒品級霍集斯等俱奏請議敘外伊等帶領侍衛藍翎侍衛三人兵

丁五十四名頗屬効力酌將奮勉出衆之額穆爾等七人分別賞戴孔雀翎藍翎此內陣亡之藍翎侍衛阿里木伯克乃霍集斯所屬於伊西洱庫爾之戰帶我瑪尼纛招撫山上賊衆被烏鎗傷身故酌賞阿里木伯克家屬銀五十兩其侍衛等賞緞二端銀三十兩戴獎賞翎者賞銀十五兩兵丁緞一端銀十五兩奏入報

聞

甲寅

命賞軍營効力官員等孔雀翎藍翎

上諭軍機大臣曰富德等揀選効力之侍衛官兵九十人除加恩賜以巴圖魯號及原戴獎賞孔雀翎藍翎之三十五人外其原未賞翎者五十五人著頒發孔雀翎十五枝藍翎十枝交富德酌量揀選分別獎賞以示鼓勵

乙卯

諭護軍統領努三搜捕庫車等處嗎哈沁

上諭軍機大臣曰據德舒奏稱由阿克蘇送來回人等行至賽里木遇嗎哈沁二十餘人把總徐天成及兵丁二人被害掠去回婦一人馬十四匹駝四隻外委把總一員得傷又兵丁一名回人一名不知踪跡今選派庫車綠旗回人兵丁前往追捕等語此等嗎哈沁賊人肆行搶掠殊可痛恨伊等或藏匿穆素爾嶺等處亦未可定必須搜勦淨盡德



舒既未詣戎行而綠旗回部兵衆亦復何濟著傳  
諭努三選派兵丁百名給以哈薩克馬二百匹前  
往庫車搜捕倘德舒尚未獲賊即宜趲行昨努三  
請將收服之嗎哈沁等安插烏魯木齊等處屯田  
俾招其黨衆之藏匿者朕已命侍衛巴朗前往辦  
理看來此等賊人不可養努三即將奮勉嚮導  
人等酌給錢糧如著有勞績或編入京師旗分亦  
可其餘人衆努三既許以不死俱著解赴京城備

賞現在可用之人暫行帶往招撫事竣後再行酌量辦理

丙辰

命添派哈喇沙爾等處辦事大員

上諭軍機大臣曰哈喇沙爾地居闢展阿克蘇之中既有查辦糧運屯田事務近又安插多倫回衆書山一人未能兼顧著派和其衷前往協同辦理勞三已回烏魯木齊著永瑞前往闢展協同定長辦

事

丁巳

定邊右副將軍富德等疏奏拔達克山所屬遣  
使情形

富德等奏言臣等因拔達克山所屬察都村之  
沙莽蘇爾差人來見即行曉示遣回八月初七  
日臣等所差厄魯特阿達什等領沙莽蘇爾及  
住居拔達克山交界之伯克阿里木差人密爾

茲穆爾昆等同來臣等會集大臣侍衛官員等  
令其入見據沙莽蘇爾告稱我父自葛爾丹策  
零時管轄此地今聞葉爾羌等城皆為

大皇帝臣僕霍集占敗竄我等即遵令追其後隊賊  
人逃入伯克沙穆爾游牧我因此面求歸附又  
據密爾茲穆爾昆告稱我伯克阿里木管轄五  
百戶昨奉將軍等令擒霍集占我伯克即行追  
賊各有傷損所遣來使曾經親見情願歸附以

安生計等語臣等恐係飾詞窺探因曉示云我  
前此差往之人至今未回顯係爾汗素勒坦沙  
故縱逆賊或暗行容隱我等亦不便久候惟進  
兵擒拏霍集占耳因給以印文勒限十二日回  
報初九日臣等差往沙爾呼勒之回人沙瑪木  
特與伯克沙穆爾差人賽特多羅特及綽椿村  
伯克聶則爾差人三金同來據賽特多羅特等  
告稱我伯克在拔達克山之錫克南村管轄二

千戶前霍集占猝然來到以禮拜為詞伯克沙  
穆爾適往拔達克山汗處我等不知遂聽其經  
過後得將軍等印文賞物即送交沙穆爾呈拔  
達克山汗閱看當即親身領兵邀截霍集占又  
將沙穆爾遣回游牧換給沙穆坦伯克素勒坦  
馬匹隨後遣往汗處此時應已到矣今伯克特  
遣我等賣書告知至我等起程時拔達克山汗  
又調沙穆爾協勦霍集占聞來人云素勒坦沙

汗在阿爾渾楚哈嶺遇霍集占交戰霍集占退  
回嶺下暫住齊納爾小河又交戰二次彼此俱  
有損傷但霍集占所駐之地通布哈爾薩瑪爾  
罕鄂漢等三處此時未知擒獲否又詢問三金  
等俱稱情願歸附等語臣等察看來人等情形  
雖屬恭順言詞尚覺游移因面加曉示以霍集  
占為大兵所敗窮蹙已極爾等又屢經追戰自  
難逃脫所言賊人住處有三路可通明係有心

縱放豫留地步今我派哨探兵先與爾等同行  
大兵亦即分路進發再遣侍衛賽音圖克什克  
圖阿奇木等同往若已經擒獲即遣人同來報  
知可也隨酌量加賞於初十日遣令起程一面  
派副都統伊柱巴圖濟爾噶爾領兵一百五十  
名於原設卡倫駐劄其卡倫舊有兵一百五十  
名伺前移駐以張形勢奏入

上諭軍機大臣曰覽富德奏沙穆爾來人所告拔達



克山素勒坦沙追襲霍集占情形設當日派兵窮追賊已早獲此時拔達克山若尚未將逆賊擒獻富德等既撤兵轉回來年再行進兵亦仍是伊等前往總之道路遙遠朕雖多方指示亦已後時伊等惟當應機速辦耳又

諭曰沙喇斯瑪呼斯餘衆內有達什達瓦之人二十口或伊等不知從前遷移人等現蒙恩養或因無力遷移為逆賊所迫脅今軍前効力之總管鄂

齊爾等既懇請查交管束著一體賞給口糧歸入  
伊隊若有妄行滋事者即嚴拏正法

命議敘勦賊立功之總管布尼等

上諭軍機大臣曰富德等奏稱布魯特之奇卜察克  
哈卜察克等部落承辦博羅爾拔達克山往來人  
使及外來盜竊事件伊等見小貪得每盜取馬駝  
侵擾臺站宜示以懲創因派兵二百名令總管布  
尼等訪緝賊踪於八月初二日分三隊圍守七村

莊將頭目阿卜巴斯等擒來訊問據供兩次偷盜  
馬匹駝隻屬實隨將阿卜巴斯岳勒多錫等三十  
餘人正法收其牲隻軍器其餘部落皆知警畏再  
議安插等語所辦甚合機宜著加恩將總管布尼  
交部議敘呼倫貝爾之獎賞藍翎克車德隻身遇  
賊力戰右肘為鳥鎗所傷著加恩授為藍翎侍衛  
在事官兵等俱酌量給賞

定邊右副將軍富德等疏奏查辦降回事宜

富德等奏言臣等收降回衆查有安集延之喇  
木呼里等二十九人以貿易來葉爾羌為霍集  
占迫脅同行臣等即加以撫慰令其自回游牧  
如霍集占逃入伊地即宜擒獻又嚴查有無厄  
魯特逆黨逃入回部者據歸附之伯克等告云  
上年瑪里格爾巴朗來投霍集占未加優待伊  
於隨同逃出時有厄魯特告伊欲逃即為霍集  
占所殺此外並無有名之厄魯特等奏入報

聞

己未

議撥解軍需馬匹

甘肅總督楊應琚奏言臣奉到先期籌備馬匹  
接濟軍營

諭旨謹查前督臣吳達善奏明於陝甘二省分派朋  
餵馬五千匹閱今數月臚分已壯又撥解巴里  
坤備用之馬尚有六千匹擇取五千匹備用可

得萬匹其陝省馬匹先期調至甘肅以便就近轉解至沿途草豆俱已籌辦一面分檄調解并知會已里坤辦事道員等奏入得

旨軍機大臣速議具奏尋議臣等前令該督查明各標營馬匹嗣因扎拉豐阿等奏解甘馬一萬一千餘匹則為數愈多應先儘久餵之馬挑解軍營又經遵

旨傳諭令該督查明夏季草肥之時已分派收割堆

貯料豆亦截留採買俱可供支應如所奏即將各處馬匹調至近地作運解往哈密現在奉

旨派清馥及侍衛等管解應先行解送五千匹隨後續挑五六千匹其如何分起行走及沿途照看令該督會同清馥等商酌辦理奏入

上從之

命以革職按察使圖桑阿道員固世衡發往葉爾羌効力贖罪

庚申

定邊將軍兆惠等疏奏安集延部長阿濟比等  
歸誠

兆惠等奏言前因堵截逆賊等逃路遣二等待  
衛達克塔納等傳檄霍罕額爾德尼伯克瑪爾  
噶朗安集延那木干等城并布魯特之額德格  
訥伊什奇里克等部落八月十二日據達克塔  
納遣人同額德格訥之阿濟比差人沙喇庫楚



克等呈稱閏六月十八日由喀什噶爾起程二十九日至安集延為首伯克四人俱係額德格訥之阿濟比總統與霍罕額爾德尼伯克交好隨至阿濟比游牧據云將軍大人今遣使前來我等不勝欣喜願為

大皇帝臣僕逆賊霍集占並未到此我等現在領兵遮截仍往告知額爾德尼隨據報稱額爾德尼云阿濟比既投誠我亦同心歸順并迓來使阿

濟比一面差沙喇庫楚克報知軍營等語臣等  
即於霍集占舊居令侍衛官員等列坐傳來使  
進見獻手帕為贄呈阿濟比之書譯文云謹呈  
如

天普覆廣大無外如愛養衆生素賚瑞佛之鴻仁如古  
伊斯干達里之神威如魯斯塔木天下無敵之  
大勇富有四海乾隆

大皇帝欽命將軍軍前額德格訥布魯特小臣阿濟

比恭祝

大皇帝萬萬壽今將軍自喀什噶爾遣人傳諭我等  
所給印文謹已奉到不勝歡喜踴躍適合我等  
心願布哈爾以東我等二十一萬人皆為臣僕  
今來使侍衛到我等部落日久恐煩將軍大人  
遠懷敬遣使同侍衛差人至將軍前稟明侍衛  
等不久回營為此將鈐記文書費呈等語臣等  
對來使獎阿濟比等誠心歸順並告以現在勦

賊情形勉其協力堵截至阿濟北等如欲瞻仰  
天顏可即前來命子弟代行亦可如一時難以遠離  
亦聽其便來使等敬諾仍授以答書分別賞給  
緞足於八月十三日起程奏入得

旨覽兆惠奏阿濟北額爾德尼俱恭順可嘉著頒給  
勅書賜以緞足荷包伊等若遣使入覲即辦理伴  
送來京

賜安集延霍干等部落

勅書

奉

天承運

皇帝勅諭霍罕瑪爾噶朗安集延那木干額爾德尼  
伯克額德格訥阿濟比等將軍兆惠等奏稱侍衛  
達克塔納等至安集延霍罕見阿濟比額爾德尼  
伯克俱誠心內附情詞肫懇朕深嘉悅朕為天下  
共主內外一體凡向化來歸者皆加以撫育各順

其道以安生理爾等如願入覲即可前來或遣子弟屬人代行亦一體加以恩賞茲以路遠不能多齎賜物賞彩緞各二端大小荷包各一對爾等尚其約束所部永享昇平之福特諭

諭護軍統領努三等協勦傷害大臣之嗎哈沁

上諭軍機大臣曰從前德舒奏稱由阿克蘇解來回人於途次被嗎哈沁搶掠已領兵追捕今永貴奏伊來京時行至庫車據都司舒明阿等報稱德舒

行至賽里木之阿勒坦和碩遇厄魯特百餘殺傷官兵德舒中鳥鎗身故即行文舒赫德選兵三四百名前來伊帶領搜剿等語德舒本未諳練營伍而所領之兵又復無用朕前已慮及命努三前往協助今竟為賊害雖非遇敵捐軀可比究屬歿於國事深可憫惻著加恩照陣亡例交部議卹永貴雖調阿克蘇之兵恐亦係裁汰所餘著仍駐賽里木候努三同進如努三未到即差人往促若馬匹

不數即於解送軍營之一千匹馬內酌量帶往務將為首之賊解京嚴懲或臨陣勦殺亦必盡殲逆黨前據德舒等奏請歸併臺站原以防備盜賊但伊等既經領兵搜捕著照舊分設以速陞遞

命參贊大臣阿桂前往阿克蘇辦事

上諭軍機大臣曰前命舒赫德往辦葉爾羌事務其阿克蘇辦事著德舒前往今德舒身故著阿桂前往阿克蘇辦事



諭客爾喀副將軍策布登扎布堵截嗎哈沁

上諭軍機大臣曰據策布登扎布奏八月初十前後  
可抵伊犁等語前因霍集占業已遠颺即令策布  
登扎布轉回游牧今努三同永貴協勦戕害德舒  
之賊將來恐被迫逃入伊犁或投俄羅斯亦未可  
定著傳諭策布登扎布若尚未起程即於伊犁堵  
截或已在道即由上年舍楞等逃入俄羅斯之路  
巡查追捕倘糧餉不敷即向成衮扎布定長等支

給仍行文伊等酌量策應

命晉封貝勒品級玉素富為貝勒

上諭軍機大臣曰玉素富自駐劄烏什以來辦理諸事實心報効著加恩晉封為貝勒

命伯克摩羅和卓等補授馬什伊沙噶等缺

上諭軍機大臣曰舒赫德奏烏什城除向奇木外雖有伊沙噶並不協同辦事亦無噶雜納齊商伯克等擬將四品頂藍翎之哈子伯克摩羅和卓授為

伊沙噶協辦阿奇木事務添設噶雜納齊一缺將  
四品頂舊伊沙噶伯克默特補授商伯克一缺將  
四品頂什錫野東補授哈子一缺將阿爾咱默特  
補授托克三伯克一缺將烏提塞拉木補授魯克  
察克闢展喀喇和卓托克三等四村莊之伯克請  
作為六品其餘密喇卜達魯罕訥赫卜哈提卜等  
二十九缺俱作為七品等語俱著照所請行  
命議處遲報逃兵之總兵官楊寧

上諭軍機大臣曰舒赫德奏侍衛齊克慎在阿克蘇之雅爾巴什查出綠旗洮岷營逃兵馬定國行查提督董孟據稱六月初一日在逃總兵官於十五日通報隨已正法示衆等語楊寧係專管綠旗兵丁大員於兵丁脫逃遲報半月若非盤獲幾至漏網殊屬不合著交部議處

叅贊大臣舒赫德疏奏安設臺站

舒赫德奏言查自阿克蘇至巴爾楚克應設六

臺每臺安設西安滿洲兵五名綠旗兵十名又  
於滿洲兵內揀選通曉文義之兵六名委署筆  
帖式給與頂帶分守各臺仍令三等侍衛伊靈  
阿兼管奏入報

聞

辛酉

諭刑部侍郎永貴等領兵巡查臺站

上諭軍機大臣曰永貴奏德舒被賊戕害請將赫塞

勒臺站歸併賽里木等語已令其照舊安設但嗎  
哈沁等既有百餘人則巡查臺站亦甚緊要著傳  
諭永貴於努三未來之先即領兵巡查各臺所有  
解運器物馬駝羊隻毋使賊人窺伺俟努三一到  
即同行進勦至此等大隊賊人器械齊備非尋常  
嗎哈沁可比或有逃出之回人及厄魯特等亦未  
可定伊等進勦時即行詳查具奏

定邊將軍兆惠等疏奏查辦波羅泥都出妻事

宜

兆惠等奏言准富德咨據波羅泥都之妻愛蘭  
供稱尚有出妻托和齊鄂和拉在喀什噶爾等  
處行查到臣臣即會同提督閔相師等查得鄂  
和拉於逃走時為阿卜都克勒木之弟阿卜都  
舒庫爾領去據查出鄂和拉之弟呢雅斯供同  
應俟愛蘭到日再行詳訊辦理又據提督董孟  
查報托和齊係英噶薩爾舊阿哥木呢雅斯之

妻為波羅泥都所奪後復離異托和齊係奇卜  
察克布魯特比阿奇木之從妹應遣人往取等  
語查布魯特阿奇木早經歸附現為阿里衮嚮  
導若遠取伊妹恐新降人等妄生疑懼是以檄  
令停止并將因阿奇木効力免其查取之處曉  
示伊游牧奏入報

聞

甲子



諭甘肅總督楊應琚辦理軍需駝隻

上諭軍機大臣曰楊應琚奏軍需駝隻現可得壯健者一千二百餘隨同馬匹解送軍營所辦甚妥至所奏闕展催運商駝咨明定長等於卸載後給價催用等語軍營既得健駝千餘諒足敷用若前項商駝既經停止官買又復截留守候內地商民或致聞風不進何如留此有餘俾得轉輸接濟至若詢之將軍等自必以軍營所需多多益善豈有遽

稱足用而轉為推却者自可不必行文

乙丑

諭護軍統領努三等速勒嗎哈沁及查辦脫出官兵  
上諭軍機大臣曰舒赫德奏聞德舒被害之信已令  
納世通領兵四百名前往追勦又永貴奏伊先派  
車車之回兵起程與阿克蘇兵相迎會勦等語永  
貴奏到時朕已諭努三領兵與伊協同進勦今永  
貴雖與納世通期會仍宜候努三同進者傳諭努

三以速行為要再舒赫德奏有綠旗把總等見德舒被害旋行逃出之語官兵等隨營進勦統領之人不幸陣亡即應奮力殺賊或身受重傷尚可藉口若臨陣即逃此風斷不可長在回人猶可謂不知紀律至綠旗兵自應以軍法從事著努三於事竣後查辦具奏又所奏嗎哈沁等有二三百人大概逃回之人草木皆兵妄行稟告且臺站無恙而遽請防範三城亦屬太過俱著傳諭知之

丙寅

命以安西鎮為安西府安西柳溝二衛為淵泉縣靖  
逆赤金二衛為玉門縣沙州衛為敦煌縣

丁卯

諭哈密辦事侍郎五吉等解送軍營馬匹

上諭軍機大臣曰楊應琚奏軍營馬匹分起解送第  
一起已於本月十六日起程等語此時清馥若已  
遵旨回至巴里坤自可適相會合倘尚未轉回即

著五吉同侍衛舒常蘇勒等送馬至葉爾羌除派出哈密滿洲兵及回人外仍行文同德叔寶將巴里坤存留索倫察哈爾阿拉善等蒙古兵調用又揚應琚派出從前脫出之滿洲兵解馬前抵哈密伊等熟諳道路亦令送至葉爾羌其綠旗兵著五吉裁撤仍行文清馥酌量辦理

命免叅贊大臣舒赫德追賊未及處分仍

申諭護軍統領努三等追捕

上諭軍機大臣曰舒赫德奏阿克蘇北山之布魯特  
噶岱密爾咱等游牧被賊盜去馬匹隨派兵越穆  
素爾嶺未能追及已行文永貴納世通等并自請  
交部議處等語追賊官兵以馬乏不及舒赫德尚  
無大過著從寬免議至賊人係何處踪跡未據聲  
說殊屬含混現在戕害德舒未知即此等賊人否  
努三奉到節次諭旨諒已迅速起程著再行傳諭  
知之

諭陝甘總督楊應琚等解送回人家口來京

上諭軍機大臣曰將軍兆惠等解送已經正法之回人薩拉阿琿等家屬請照例賞給肅州等處官兵為奴但此等回人家屬獲罪較重若相去較近或不免逃脫著傳諭楊應琚派員解送來京

戊辰

命陞賞拏獲嗎哈沁之官兵有差

上諭軍機大臣曰努三等奏敘拏獲嗎哈沁奮勉効

力官兵裕木扎卜等十五人功次著加恩將察哈爾署叅領裕木扎卜索倫署防禦茂罕俱准其實授厄魯特監翎侍衛巴桑授為三等侍衛索倫署驍騎校喀滿泰察哈爾署驍騎校布顏圖阿拉善署驍騎校塞卜騰索倫領催翁科爾俱實授驍騎校前鋒署筆帖式巴顏岱著授為前鋒校察哈爾署護軍校阿喇卜坦准其實授哈薩克烏拉什厄魯特哈什哈鄂欽俱授為護軍索倫兵布拉凱吉



林兵烏林泰俱授為領催阿拉善兵延扎卜托卜  
羅克著賞戴藍翎仍賞銀各二十兩

命以索倫兵慶安保為驍騎校

上諭軍機大臣曰兆惠等奏遵旨查得侍衛成果至  
喀什噶爾聞布魯特人衆圍布喇村即派索倫兵  
慶安保同額爾克和卓額色尹之人令布魯特息  
兵布魯特遂收兵轉回等語成果已恩賜已圖魯  
號慶安保著加恩授為驍騎校

申諭護軍統領努三等勦撫嗎哈沁事宜

上諭軍機大臣曰努三等奏俟雪落後搜捕嗎哈沁  
餘黨將闢展兵三十名留用等語昨已屢諭努三  
速往庫車協同永貴勦除戕害德舒之賊至烏魯  
木齊附近即有一二餘黨永德儘可辦理再所奏  
拏獲之厄魯特伯楞泰因其熟習烏鎗令為嚮導  
伊奮勉効力擒獲多人等語努三查明拏獲嗎哈  
沁等仍有似此効力之人即帶領進兵一面酌量

奏請給以職銜其餘賊衆不可仍留原處卽設法移入內地派員解送來京分賞王大臣為奴

命以革職之原任副都統富昌發往葉爾羌交叅贊大臣舒赫德差遣委用

己巳

訓諭定邊右副將軍富德等擒賊不力

上諭軍機大臣曰富德等奏屢次遣使前往拔達克山久無信息今派伯克霍集斯巴圖魯侍衛額爾

登額領兵一百名向拔達克山索取霍集占等語  
所辦殊屬錯謬從前既不發兵此次何以忽遣且  
將軍叅贊大臣俱未聞前往僅使侍衛額爾登額  
同伯克霍集斯一行有是理乎即謂將軍不宜輕  
進明瑞亦當前往況拔達克山豈因一霍集斯之  
言遂縛賊以獻即令獻出賊人而其功似出於霍  
集斯將軍大臣等復置身何地乎此事從前伊等  
初奏時即有畏難之心朕因伊等馬力實乏是以

未經申飭令觀所奏是早蓄不能獲賊亦可退兵  
之意不過難以啟口耳從前之將軍大臣等何嘗  
不効力行間每因功已垂成稍為退縮遂致債事  
獲罪富德等豈未之知昨因富德母老諭令前來  
省視看來伊不能承受恩澤著仍駐葉爾羌俟孥  
獲逆賊後再行請旨併傳諭兆惠知之

命議敘勦殺盜馬賊衆之官兵等

上諭軍機大臣曰富德等奏稱協領布爾哈等將盜

馬之布魯特等五十餘賊全行勦殺收其牲畜軍器等語著加恩將吉林協領布顏圖巴圖魯布爾哈藍翎侍衛獎賞孔雀翎丹巴巴圖魯那木查爾馬甲獎賞孔雀翎伯勒格圖巴圖魯扎奇勒圖獎賞藍翎寧古塔馬甲錫勒畢善索倫領催錫勒爾圖馬甲恩德保寧古塔馬甲烏林保俱交部議敘獎賞藍翎之索倫領催塔本岱尼魯特兵扎勒俱受鎗傷塔本岱著授為藍翎侍衛扎勒著獎賞藍

翎各賞銀二十兩仍交部議敘厄魯特兵哈薩克  
回人阿卜都爾瑞亦各賞銀二十兩

命按察使銜納世通在庫車辦事道銜德文協辦阿  
克蘇事務

上諭軍機大臣曰據德文奏稱准舒赫德永貴等行  
文催往庫車辦事已領兵四十名起程續調闢展  
兵一百名接應等語此等嗎哈沁能有幾人納世  
通領兵四百已足敷用德文又增兵如許不過為

保身之計甚屬怯懦看來庫車事務非德文所能  
辦者調往阿克蘇隨阿桂辦事納世通者辦理庫  
車事務俱傳諭知之

平定準噶爾方略正編卷七十八